



Aduertissement d'éviter scandale : & pardonner à ceux qui reconnoissent leurs fautes : & dix Lepreux guaris.

IESVS exhortant ses Disciples, leur dist, Il est impossible qu'il n'aduienne scandale; mais malheur à celuy qui en sera cause. Soyez sur vos gardes, & si ton frere a peché enuers toy, reprends-le, & s'il se repent, remets luy sa faute, non seulement vne fois, mais autant de fois qu'il se retournera vers toy. Les Apostres luy dirent, Seigneur augmente nous la foy; lors Iesus leur montra la vertu d'icelle: Puis par l'exemple du seruiteur d'un seruiteur, qui fait son deuoir enuers son maistre, il montre qu'aussi nous nous devons estimer seruiteurs inutiles, quand nous aurons fait tout ce qui nous sera commandé: car nous n'aurons fait que ce à quoy nous estions tenus. Et aduint, comme Iesus allant en Ierusalem passoit par le milieu de Samarie & de Galilée, dix Lepreux s'écrierent, disans, Iesus aye pitié de nous; & il leur dist, Allez vous montrer au Sacrificateur; & aduint qu'en y allant ils furent nettoyez: mais vn qui estoit Samaritain, se voyant guaruy reuint, glorifiant Dieu, se ietta aux pieds de Iesus, & luy rendit graces; & Iesus dist, N'y en a-t'il pas dix de nettoyez? où sont les neuf? ils ne sont point retournez: & Iesus luy dist, Leuetoy, ta foy t'a sauué.